

sukan

Temasya olahraga medan tonjol potensi

Oleh Faizatul Farhana Farush Khan
bhvarsiti@bh.com.my

Durian Tunggal

Temasya Olahraga Universiti Malaysia Pahang (UMP) berlangsung meriah di Sekolah Sukan Malaysia Pahang (SSMP), baru-baru ini, dengan menyaksikan saingan menarik dalam 10 acara dipertandingkan.

Pengarah Pusat Sukan dan Kebudayaan (PSK) UMP, Abd Rahman Safie, berkata acara terbabit ialah lempar cakera,

lontar peluru, merejam lembing dan larian 100 meter (m), 200m, 400m, 4x100m, 4x400m, 1,500m serta 5,000m.

Beliau berkata, pengajuran temasya itu bertujuan mencungkil bakat mahasiswa dan kakitangan UMP dalam bidang sukan, sekali gus membantu persediaan atlet yang akan mewakili universiti berkenaan pada Sukan Staf Universiti Malaysia (SUKUM) tahun ini.

"Universiti mahu memberi peluang kepada pelajar dan kakitangan menonjolkan potensi diri, seterusnya melayak-

kan mereka yang berkebolehan untuk melangkah ke peringkat saingan lebih tinggi.

Cari pelapis

"Temasya ini boleh disifatkan sebagai sesi uji bakat untuk mencari pelapis UMP dalam sukan olahraga, selain dapat merapatkan hubungan antara warga universiti," katanya ketika berucap pada majlis penyampaian hadiah kepada pemenang.

Abd Rahman berkata, temasya tahunan bawah kendalian PSK itu mendapat sambutan cukup menggalakkan daripada

pelajar dan kakitangan.

Beliau berkata, keadaan cuaca panas ketika acara berlangsung tidak melunturkan semangat peserta yang berusaha keras menunjukkan kemampuan dan merebut kedudukan teratas.

Sementara itu pelajar Fakulti Kejuruteraan Kimia dan Sumber Asli (FKKSA), Muhammad Alif Faisal Roeslan, 23, menyifatkan pengajuran temasya berkenaan secara langsung meningkatkan semangat warga UMP untuk mengasah keupayaan diri dalam bidang sukan.



Peserta bersemangat menjayakan Temasya Olahraga UMP.



Antara peserta yang memenangi acara dipertandingkan.



Temasya menyaksikan saingan menarik antara peserta.



Peserta berusaha keras menyerlahkan bakat dimiliki.